



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

Tir Yimyim

tiryimyim@aolima

tir yimyim

TAPAK 7

John Magufuli nem akhüm  
tetushi agütsüi arur 45 ajemset

Temelenshi bener arutsü atema  
Mamata tsükdaktsüsüla: Amit Shah



VOL. XVIII NO. 166 (ADOK 166) DIMAPUR

RASEMNÜ (WEDNESDAY)

METSÜREMI (MARCH) 31, 2021

₹ 5.00

## COVID-19 Nagaland: Shinga dak-a meputet

**Kohima, March 30 (TYO):** Mongulbarnü Nagaland nung nisung shinga dak-a COVID-19 aliba meputet.

"Tanü shinga dak-a COVID aliba meputet" ta Health & Family Welfare Minister, S Pangnyu Phom-i ashi.

Nisung 12,233 rongnungi 11,980 taneptsü nguogo aser Nagaland nung COVID-19 nungi taneptsü angurji 97.93% lir, ta paisa metetdaksü.

"Nagaland nung COVID-19 puteta alir nisung 91 asü saka parnok 10 bo tanga timtem ajanga asü. Nisung 154 tashi tanga state temi ogo" ta Health & Family Welfare Director, Dr Denis Hangsing-i ashi.

Tang anepalurtemji Dimapur nung nisung 5 aser Kohima nung nisung 3 lir. Parnok shinga dak-a shirangba yimya kecha mali, ta paisa ashi.

Nagaland nung COVID-19 alitsü akok ta temolung melemi

bilemba sample 1,36,126 tendangogo. RT-PCR ajanga 75,356, TrueNat ajanga 37,520 aser Rapid Antigen Test ajanga 23,250 tendang, ta Dr Hangsing-isa metetdaksü.

Nagaland nung nisung 62,046-i COVID-19 vaccine agiogo:

Nagaland nung nisung 62,046 nem COVID-19 vaccine (covishield) agütsüogo.

Mongulbar tashi nung nisung 62,046 nem vaccine dose 85,121 agütsüogo, ta State Immunization Officer Dr Ritu Thurr-i metetdaksü.

Vaccine agirtem rongnung frontline workers 36,983, healthcare workers 12,088, teintet rogo 10,288 aser arishi küm 45 tempur 2,687 lir, ta paisa ashi.

Vaccine agirtem rongnung healthcare workers 8,266 aser frontline workers 14,734-i dose anaprong agiogo, ta Dr Thurr-isa ashi.

## HNLC-i 'benami' shishilembartem, ochimashi ketdangsürtem tepsettsü amokmerener

**Shillong, March 30 (Agencies):** Hynniewtrep National Liberation Council (HNLC)-i Meghalaya nung miima shishilembartem, ochimashi sorkar ketdangsürtem aser tiyongtsü nung inyaker nisungtem merenshitsu osang metetdaksüogo.

"Ozüng alema mapa inyakerem bushitsu aser parnok tasüba agi merenshitsu telemteba agiogo" ta HNLC general secretary Saiñkupar Nongtraw-i Mongulbarnü ashi.

Khasi, Jaintia Hills aser Ri Bhoi district tem nung benami shishilembartem aser sorkar o nija sector nung ochimashi ketdangsürtem aliba osang onoki angazükogo, ta paisa ashi.

Tangalen nungi aruba shishilembartemi local

shishilembartem, contractors aser yimsüsürtem tenüng amshia mapa inyaker state nungi sen bener aoer. Bendangertemi tim mesüi shishilembaba ajanga parnok income tax magütsüi jenbur" ta Saiñkupar Nongtraw-isa metetdaksü.

Meghalaya nung industry aika benami inyakyim ajanga takar akümer, ta HNLC tanishirisa shisem.

Iba benami shishilembaba nung yimsüsür kar dena lir aser ano dalal (middlemen)-i state sorkar nungi NOC aser single-window clearances angur" ta paisa ashi.

Jaintia Hills, Khasi Hills aser Ri Bhoi district tem nung loktitentet tanishir kari iba inyakyim nung yariteper, ta Nongtraw-isa ashi.

## Northeast India nung tzunglu kanga arutsü: IMD

**Shillong, March 30 (Agencies):** Northeast India nung state aika nung taruba anogo 5 tsüngda tzunglu kanga arutsü ta Indian Meteorological Department (IMD)-i metetdaksüogo.

Assam, Meghalaya, Tripura aser Mizoram nung April 2 tashi tzunglu kanga arutsü ta IMD-i ashi.

Assam anüolentip, Meghalaya, Tripura aser

Mizoram kübok tesem aika nung tzunglu kanga aruba ajanga anentsüh alutsü aser tüzümsüing timtem ajurutsü ta parnokisa ashi.

Anogo ishika tsüngda Northeast state tem nung yipru aita tzunglu arutsü, rü alatsü aser 40-50 kilometre per hour mopung aontsü. Anungji nisungtem kidang dang amongtsüla aser ainlen mesenzüsüla, ta IMD-isa metetdaksü.

## Noksen by-election atema H Chuba Chang-i dang tenüng agütsü NPF TICKET MESHIR SHINGA MALIASÜ

**Kohima, March 30 (TYO):** Nagaland nung Mongulbarnü 51-Noksen Assembly by-election atema tenüng agütsüba tembangogo aser election nung tokteptsü atema candidate kati dang kulikakettem agütsü.

"Nationalist Democratic Progressive Party (NDPP) candidate H Chuba Chang-i dang by-election atema nomination süogo. Pa ya People's Democratic Alliance (PDA) consensus candidate lir" ta Nagaland Chief Electoral Officer, Abhijit Sinha-i ashi.

Bodbarnü kulikatem reprangtsü aser April 3 tashi nung tenüng meyipa agitsü akok. Iba sülen Tuensang district kübok 51-Noksen Assembly Constituency indang



H. Chuba Chang File photo)

Returning Officer-i election nung tetokteper shinga melii takok anguba osang sangoktsüsü, ta Abhijit Sinha-i metetdaksü.

April 17, 2021 nü 51-Noksen Assembly menden atema by-election agitsü sentong lir.

H. Chuba Chang ya

Nagaland Legislative Assembly (NLA) nung pezüben tashi MLA inyaker ka lir. Hombarnü NDPP office, Chumukedima nung pa nem ticket agütsü.

Yaküm October 12 nü Environment, Forest & Climate Change and Justice & Law, C. M. Chang ajungbena asüba agi 51-Noksen assembly menden tazüing aküm.

Züngsem 60 agi akümiba Nagaland Legislative Assembly nung opposition tongtiba- Naga People's Front (NPF) MLA 25 lir. Ajisüaka, iba by-election nung parnok metokteper.

"51-Noksen assembly by-election atema NPF ticket meshir shinga maliasü" ta NPF Legislature Party spokesperson, MLA Imkong L. Imchen-i metetdaksü.

## Covid tensa tamajungba küma aoer: Union Health Ministry

**New Delhi/ Mumbai, March 30 (Agencies):** Linük nung COVID-19 tensa tamajungba küma aoer aser iba ya shisabulutsü khuret tulu ka lir, ta Mongulbarnü Union Health Ministry-i metetdaksüogo.

Union Health Ministry-isa COVID-19 kanga putetba state tem nung RT-PCR nung temolung agütsüsü, putetertem tekaratiba nung balaka yur anepalutsü aser healthcare maparen akangshitsu tetuyuba agütsüogo.

Tanep 8:00 ako tashi nung ghonda 24 tsüngda India nung nisung tasen 56,211 dak

COVID-19 aliba puteta alitsü.

Tanü tashi nung linük nung nisung crore 1.20 tema dak COVID-19 putetogo aser parnok rongnung crore 1.13 tema taneptsü nguogo aser tang nisung lakh 5.40 anepaludar.

Tesüiba ghonda 24 tsüngda nisung 271 asüba züngsema tang tashi nung COVID-19 ajanga nisung lakh 1.62 süogo.

India nung COVID-19 tasen adokba prokshibaji Maharashtra state nung lir aser iba state nung April 1, 2021 nungi standard operating procedures (SOPs) tasen kar sayatsü akok.

Maharashtra nung

anogoshia nisung timba dak COVID-19 puteta aruba agi ano tanaben lockdown asütsü akok ta tsüba bilemba agi tanga state tem nungi aayangi arurtem pei pei state-i meyipa aotsü sentong renemba osang angazüker. Ajisüaka state sorkari lockdown alitsü osang kecha mesangdongi lir.

Yaküm March 24 nü linük ajunga anogo 21 lockdown asütsü osang sangoktsüba sülen Maharashtra nung tanga state tem nungi arua mapa inyakerem aika chiyungtsü aser sen melii pei pei state-i tetsüing agi jajayonga aoba tensa ka ajuruogo.

## Manipur-i Myanmar refugee tem meyipa yoktsü tuyuba agien

**Imphal/Aizawl, March 30 (Agencies):** Manipur sorkari ketdangsürtem dang Myanmar nungi aruba refugee tem meyipa yoktsü tetuyuba agütsüba agienogo.

Manipur home ministry-i ashiba agi, parnok tetuyuba agütsüba aibelena meyipzük.

Myanmar nunger refugee aika Manipur-i arur ta osang angazükba sülen state sorkari iba tetuyuba agütsü.

March 28, 2021 nü Manipur sorkari Chandel, Tengnoupal, Kamjong, Ukhrul aser Churachandpur nung Deputy Commissioner tem dang Myanmar sensotem aruba noktangtsü tuyu.

"Myanmar nung tensa mejungi akümiba ajanga,

Myanmar sensotemi Manipur dena Border State tem ajanga India nung arua jenoktsü meranger" ta Special Secretary (Home), M. Gyan Prakash-i metetdaksü.

Iba tetuyuba nung District administration dang Myanmar sensotem jenoktsü atema teseper aser chiyungtsü magütsüsü shia liasü.

Ajisüaka, tang Manipur home ministry-i tetuyuba tasen ka agütsüba nung "state sorkari meimchir aochiba tangatetba nung mapa ajak inyaka arur aser tawa yirua aliba Myanmar sensotem Imphal-i anir oa anepaluogo. State sorkari akokba tashi yariteper" ta shia lir.

Mizoram nung Myanmar nunger 1000 tema jenoka lir

Myanmar nungi nisung 1,000 den tema Mizoram nung miima arua jenoka lir ta Mizoram home department ketdangsür kati ashi.

Myanmar sensotemji timba police personnel aser firemen lir aser parnok border district tem aser Aizawl nung jenoka lir, ta paisa ashi.

"Mizoram home department-i osang bendenba nung Hombar tashi nung Myanmar senso 1,042 tashi state nung arua lir ta shia lir. Parnok timba ka arrtsülen aliba yimtsüingtem nung jenoka lir aser local NGO temi teyari balala agütsü. Karbo parnok kinungertem den jenoka lidar" ta ketdangsürisa shisem.

### ASLB SANGDONG

Ao tazungtsü kaket Class 1-10 tashi Rongchii 1 (April), 2021 nungi ASLB office nung talitsü angutsü. Class 1-8 tashi kakettem Private school-tem atema dang alitsü.

Sd/-

Dr. L Temjen Jamir  
Chairman, ASLB.

Sd/-

I Temjen Tzüdir  
Secretary, ASLB.

## Mon nung tetsürtem asoshi awareness sentong ka agi



**Dimapur, Metsüremi/March 30 (TYO):** Mahila Shakti Kendra (MSK) Mon aser District Administration, Mon lungjemer March 26, 2021 nü Town Council Hall, Mon nung teinlonglong (adolescent) tetsürtem asoshi Beti Bachao Beti Padhao awareness sentong ka ayongzüka liasü.

Iba sentong ya talisa Class VII nung azüngba kaketshir tetsürtem atema ayongzüka lir, kechiaser parnok melenshiba mapang ka nung lir, ta SDO(C) Mon, Ilika Zhimomi, NCS ajanga ashi.

Iba sentong ya teinlonglong tetsürtem nem onük balala nung awareness agütsüsü nukjidong nung ayongzüka, koba parnoki kidang mesüra school nung mangazüki alitsü akok, ta lai ashi.

Iba sentong nung jembiba onüktem ya school curriculum nung malitsü akok, saka tesayur temia pei school iba mesük sentong ya ayongzüksüla, ta lai ajungshi.

Teinlonglong tetsürtem

reproductive health indang nung ajemdaker jembiba mapang, M.O Tang PHC, Dr. Khumrila Sangtam ajanga tanur nungi tain akumba mapang temang shilem balala nung temelenshi aliba indang lemsatep.

Laisa tetsürtem itashilem aoba aser itashilem aoba mapang temang mürekmejua ayutsüba yimyatem nung tesayuba agüja liasü. Laisa tetsürtem itashilem aoba mapang timtem ajurudang takotet nisungtem nungi teyari agitsü indang ashi.

District Coordinator (MSK), Neijoi Konyak ajanga "Good Touch & Bad Touch" onük nung jembiba, temeim agi kongshiba aser tebilemba tamajung nung kongshiba telemsa indang rasaa ashi.

Tim mesüi kongshiba indang lai jembiba aser kaketshirtem ta iba amala yimya anema ola adoktsü tsüpua malitsü ajungshia liasü. Iba ama yimya amshidak ola madoki aliba ajanga teinyakeri tali inyaktüsü

ajungshir amai akumer, ta lai ashi.

Coordinator Childline Mon, Eunice Thalih ajanga Childline 1098 indang inyakyim lemsatep, kobai Toll Free number 1098 ajanga timtem nung aliba tanurtem kumzüker aser yarir.

Lai ashiba agi, call agizükba sülen minute 60 tsüngta Childline team tem tesem tonga arur.

Childline yagi tanur arishi küm 0-18 tsüngta alirtem yarir aser kota masüba mapang arishi küm 25 tashi yarir.

Lai kaketshirtem dang iba service ya pei aser dangertem asoshi amshitsü ajungshi aser osang agütsüsü tsüpua malitsü ajungshi, kechiaser iba maparen nung osang agütsür tentung temai madoktsür,

Iba sentong nungsa Childline 1098 indang awareness video tatsüka sayua liasü.

Iba sentong nung District Coordinator (MSK), Olem Konyak menden liasü, kong school balala nungi kaketshir tetsürtem dena liasü.

## Aboi nung Anti-Social Elements Day mungogo

**Dimapur, Metsüremi/March 30 (TYO):** Konyak Baptist Bumeinok Bangjum pur kümshi yangluba Calendar 2021 nung aliba ama, Aboi Town nung NGOs, Arog balala aser ATBC Youth Department ajanga "Say No to Drugs and Yes to Life" omen nung ajemdaker March 30, 2021 nü Anti-Social Elements Day munga liasü.

Sentong nung jembiba mapang, kibong ya loktiliba aser nisung meimchir liyonga aotsü asoshi tongtipang shilem ka lir aser tanurtem lenmang shidak nung anitetsü ya tsürabur teinyaktsü lir, ta ADC Aboi, Chumlamo Hustsoe, NCS ajanga ashi.

Pai nüburtem dang tazüing aliba mapangtem timi amshitsü aser danga lenmang nung item

mapang indoktsü dang nungibo local ground aser indoor stadium nung mapang indok tajungba, ta shia liasü. Paisa sentong ayonger dang iba ama sentong ayongzüka asoshi pelaba shisem, koba nüburtem asoshi kanga tongtipang lir.

MO (CHC) Aboi, Dr. Hangsha ajanga sentong nung adenertem dang temesepba miim mozütem medeni takum alitsü ajungshi aser temesepba mozü amshirtem rongnung danga tashidak tekeraba menatepa aor, ta ashi. Ibaji ajanga pei dak dang masü saka lokti nung khuret adokdaksür, ta paisa ashi.

Anti-Social elements ya nisung yimya ka lir, koba kibong mesüra loktiliba nung magizüker, ta KU branch Aboi indang tatong tir Phongnyei-i ashi.

KNSK Aboi ajanga küm 30 jungnüa Anti-Social Elements Day ya ayongzüka monga arur, ta KNSK tiri ashi. Iba ama sentong tajung tenzüka asoshi lai KNSK Aboi tenzükertem dang pelaba lemsatepa liasü.

Maneni KBBB, ATSU, AASU nungi teshimtet nübutemia iba sentong nung o tatsüsü jembiba liasü.

Iba sentong nung Sector Pastor ATBC, Manpong menden liasü, aser Pastor ATBC, Rev. Yeangphong ajanga okila o jembiba.

Iba sentong tembangba sülen Aboi jila kübok ward toku nungi nüburtem aser school balala nungi kaketshirtemi local ground tashi "Say no to Drugs and Yes to life" yimyim ayima tetsüing agi jaja liasü.



March 18, 2021 nü Wb. Sentinuklu Jamir, Director Evaluation Department-i District Evaluation Office, Longleng ki tasenba semzüksüba mapang tangokba noksa nung angur.

## Longleng nung Girl Child Week sentong agiogo

**Dimapur, Metsüremi / March 30 (TYO):** District administration aser Mahila Shakti Kendra Longleng ajanga Beti Bachao Beti Padhao (BBBP) kübok "Empowering girls for a brighter tomorrow" omen nung ajemdaker March 27, 2021 nü Yingli College, Longleng nung Girl Child Week anogomung munga liasü.

Iba sentong nung shisalen sayur Youth Secretary PBCA Longleng, Phakmei Phom ajanga tebur aser tetsürtem tsüngta jenjang balala indang jembiba aser nisung kati pei sempet angatetsüla aser dangar tetsürtem nungi pai ajungmesotsüla, ta ashi. Pai tetsürtem dang parnok ya khenyongi balala lir, ta shia liasü.

Sentong nung Girl Child Week anogomung ratet ya EAC Hq. Longleng, Rohbi Sangtam ajanga ashi aser EAC Longleng, Pichano Kikon ajanga tetsürtem dang pei temenden angazüktsü aser metetsü asoshi iba ama sapang ya teti amshitsü ajungshia liasü.

Iba sentong session tanabuba nung ken atenba, tsüingsangba, o jembiba, sangro azüngba amala shilem balala agia liasü. Maneni puzzle picture, word guessing, picture portray, arr atsütepba amala asayatem asaya liasü.

Telok balala lemsar asayba balala nung tetoktepba agidak "Girl power" ajanga takok ngua liasü. Iba sentong nung Women Welfare Officer, MSK Longleng menden liasü.

## Excise puri Dimapur nung yi apu



**Dimapur, Metsüremi/March 30 (TYO):** Excise Narcotic cell personnel temi March 28, 2021 aonung truck ka (Registration No. AS 01 CC 4206) nungi Indian Made Foreign Liquor (IMFL) aser Beer cases 450 nguteta liasü. Iba gari ya Purana Bazar, Dimapur nung anendaktsü aser mita repring.

Gari nung yi ya amtsük (biscuit) indang carton agi telunglen nembanga liasü, koba Guwahati tezülen nungi inoka

abenba liasü. Iba dak sendakba nung Baruating P/S Howraghat, Assam nung alir Abdul Majid'er jabaso arishi küm 26 tain Kamrul Islam aser Mantri Pukhri, East Imphal, Manipur nung alir Kamlesh Kumar'er jabaso arishi küm 20 tain Kunal Shah pua NLTP Act 1989 kübok tapet ozüing nung ajemdaker ken o benok.

Pua aliba osettem ya Excuse Malkhana nung yua lir aser Destruction Board ajanga raksa indoktsü, ta sangdong ka ajanga ashi.

## Mokokchung District nung kechi tesem nung sa COVID-19 vaccine agitetsü

- \* District Hospital Immunization room.
  - \* UPHC : Tuesday 10am - 4pm
  - \* CHC- Tuli (Hombar), Changtongya (Bodhbar), Mangkolemba (Hombar)
  - \* PHC- Kangtsüng, Chuchuyimlang, Mongsenyimti, Ungma, Longsa, Sabangya, Alongkima, Tsürangkong, Mangmetong, Longjang Longchem.
  - April 1st 2021 nungi Lakhuni, Longkhum, Merangkong nunga vaccine agitsü.
  - District Hospital Immunization Room nung Hombar, Mongolbar, aser Bodhbar anogo tem nung 10am to 4pm tashi laboka alitsü. Tanüngba tesem tem pei yimtsüng sasep mapang tem nung agia aotsü.
  - \* Na tasoba küm 60 nungi tema sura, nu ID Card(Aadhar, Electoral Photo ID, Govt.ID Card)
  - \* Na tasoba küm 45-59 sura, Photo ID Card, na temang anepaluba Doctor(shiranga lira) nungi khuli kaket (Certificate)March 31st 2021 tashi dang Nungdaksü.
  - Mozü ya anaben agitsü nungdaker. Mezüing buba ajem agir anogo 42-56 (6-8 weeks) tetsüingda lir tanabuba ajem agitsü.
  - April 1st nungi bo küm 45 tema pur Doctor nungi khuli kaket mali yonga nisung ajak agitetsü.
- For further queries, contact Mokokchung District Control Room numbers: 7628854582/7630007954.



Arunachal Pradesh chief minister Pema Khandu-i Changlang district kübok Gandhigram nung helipad lapoktsüdang agiba noksa angur. Arunachal Pradesh CM Pema Khandu-isa Changlang district kübok Vijaynagar circle nung Yobin kin nung atema gari lenmang yanglutsütsü nangzük.

### Minister Sarma-i Mohilary amokmerenba atema Congress-i kenobenok

**Guwahati, March 30 (Agencies):** Congress-i Election Commission of India (ECI) tsüngdang Assam Minister aser Northeast nung BJP lennir Himanta Biswa Sarma anema ken o ka benokogo.

Himanta Biswa Sarma-i Assam Assembly election atema nüboyima mesenzütsü aser FIR ka benoktsü atema Congress-i ECI dang mepishio.

Assam Assembly election nung BJP atema nüboyima senzüdang Himanta Biswa Sarma-i Bodoland People's Front (BPF) lennir Hagrama Mohilary tepuokdaki yoktsü ta amokmerenba atema merenshitsuila ta Congress-i ECI dang ashi.

Sarma-i Central Agency - NIA ajanga BPF chairperson Hagrama Mohilary tepuokdaki yoktsü amokmeren aser NIA ya BJP-i aniba Center sorkari azüoka lir, ta parnokisa metetdaksü.

"NIA-i Mohilary anema bushisüngdang aser tepuokdak yoktsüsa onoki (BJP) inyaksü ta Sarma-i ashi" ta Congress-isa ECI dang sgiogo.

Central investigative agencies ya Centre-i election nung takok angutsü atema amshiba teloktem masü. Sarma-i jembiba olenji MCC (Model Code of Conduct), RP Act, 1951, Indian Penal Code (IPC) anema lir. Sarma-i Central investigating agencies amshia pa den toktepertem timtemdaksür, ta parnokisa ashi.

Bengali-Hindu telungpurtemi BJP-AGP-UPPL pusemstsü Tamulpur, March 30 (Agencies): National Liberation Front of Bengali (NLFB) züngsemtemi Assam nung BJP-AGP-UPPL teloktep yaritsü ta osang metetdaksüogo.

Temai adokba NLFB züngsemtemisa Assam nung Bengali nung vote enoktsürtem dang BJP-i aniba teloktep nem vote enoktsütsü ayongzükogo.

Mongulbarnü Baksa district kübok Tamulpur nung NLFB züngsemtem adenshi aser idangji parnoki UPPL candidate Leho Ram Bodo pusema nungitba metetdaksü.

"Onoki Assam sorkar nung tongti ketdangsürtem den

jembishinüdar aser parnoki onok indang khurettem koktsütsü ta nangzükogo" ta NLFB tanishir Krishna Poddar-i ashi.

"Hiren Nath (Assam Police Special Branch IGP)-i telungpur temai adokertem yaritsüba maparen timi inyakdar ta shiogo aser iba jagi onoki osang tajung angashitsü imlar" ta paisa ashi.

NLFB tanishirisa Hindu-Bengali nung dang BJP-AGP-UPPL-GSP teloktep yaritsü ayongzük.

"Tamulpur Constituency nung ni Bengali vote enoktsür ajak dang Leho Ram Bodo nem vote enoktsütsü ayongzük kechiyong pai takok angutsü ta onoki temolung alemer" ta Poddar-isa metetdaksü.

Centre sorkari Citizenship Amendment Act agizükba sülen January 2020 nung National Liberation Front of Bengali (NLFB) züngsem 301 tashi Guwahati nung temai adoka liasü.

April 6, 2021 nü Assam Assembly election shilem tasembuba nung Tamulpur Assembly constituency nung polling agitsü.

## United Christian Forum-i UPPL pusemba aitsür: NBCC

**Kokrajhar, March 30 (Agencies):** Bodoland Territorial Region (BTR) nungi United Christian Forum (UCF)-i Assam Assembly election nung UPPL pusemstsü lemtetba atema mepelar ta Hombarnü National Boro Christian Council (NBCC)-i metetdaksüogo.

NBCC ya Northeast aser West Bengal nung Catholic aser Protestant Bodo Christian tem lokti tentet ka lir.

NBCC-i Assam nung Bodo Christian nung Assam Assembly election nung pei molungba party nem vote enoktsütsü aser state nung alir ajak yariba democratic sorkar ka nem tashi agüjang ta ayongzükogo.

Hombarnü UCF-i UPPL pusemstsü lemtetba osang metetdakja liasü. Bodoland Territorial Council (BTC) nung taoba BPF-i aniba sorkari BTR nung Bodo Christian tem atema kecha meinyaktsü ta parnoki ashir.

UCF ya NBCC nung züngsema lir ta ashiba olen

NBCC-i aitsüogo. "United Christian Forum ya kecha len agia NBCC den sendaktepa mali. United Christian Forum-i jembiba magizük kechiyong iba telok ya onoki memetet aser meyarir" ta NBCC president Arjun Basumatary-i Kokrajhar nung osangbener den jembidang ashi.


NBCC-i secular state ka nung amanger aser iba ama linük ka nung tamangba yimsü ajaki pei molungba ama amangettsü, ta Basumatary-isa ashi.

"Onoki political party ka dang menungiter saka BTR nung yimjung aser terenlok bener arutsü atema tiyongtsü nung dang inyaksangshir" ta paisa shisem.

"Tesüiba küm 26 tashi NBCC-i Northeast aser West Bengal nung Boro Christian tem kümzüka ayutsü atema inyaka arur" ta NBCC-isa metetdaksü.

Assembly election tiptema agitetsü atema Boro Christian nung ajaki sarasademtsü mepishir, ta NBCC-isa ashi.

## Facebook post ka atema Tripura sorkar mapa inyaker ka anentsü



**Agartala, March 30 (Agencies):** Agartala Government Medical College (AGMC) nung mapa inyaker kati Facebook page nung osang ka prokshiba atema BJP-i aniba state sorkari la mapa nungi anentsüogo.

AGMC nung tender melii jenjang tasak indang machine ka ali aser ibaji officer on special duty ka ajanga inyaker ta AGMC nung physiotherapist Anindita Bhowmik-i Facebook nung metetdaksü.

Social media nung pei bilemba lemsatepba atema sorkari mapa nungi anentsütsü makok saka Tripura state sorkaribo la mapa nungi anentsüogo.

Yaküm AGMC nung doctor Kaushik Chakraborty-ia Facebook nung olen ka lemsatepba atema mapa nungi anenja liasü.

Bhowmik ya BJP MLA Arun Chandra Bhowmik'er jala lir. Pa ya Belonia autonomous district council constituency

nungi MLA lir. AGMC ketdangsürtemi la dang phone asü aser Facebook post agientsü rongshi ta Bhowmik-i ashi.

Ketdangsürtemi la amokmeren aser tatem nung tebu dang par jala mesüzüksü atema mozü kidangi arutsü ashi, ta laisa shisem.

Ajisüaka, Bhowmik-i parnoki akhangba ama meinyakba agi ketdangsürtemi la mapa nungi anentsü.

Tripura nung taoba Left Front sorkar mapang nunga Bhowmik-i tebilemstsü onük balala atema jembia aruogo aser lai ozüngi melaba ama mapa inyaksü ta ashi.

"Taoba mapang ni yimjak nung tebilemstsü onük balala atema social media nung Left front state sorkar indang jembio saka iba amai shingia ni amokmeren masü. Tang ya Facebook post tila ka atema ni mapa nungi anentsüogo. Ni ozüngi melaba ama teyari bushitsü" ta laisa metetdaksü.

### GOVERNMENT OF NAGALAND DEPARTMENT OF HIGHER EDUCATION KOHIMA: NAGALAND

#### Nagaland Government Ex-Gratia Scheme for Students Studying Outside Nagaland(NGESSO)

The Government of Nagaland had launched the Nagaland Government Ex-Gratia Scheme for Students Studying Outside Nagaland(NGESSO) to provide an Ex-Gratia of Rs. 5 lakh only in the event of any unfortunate deaths of Indigenous Naga Students of Nagaland who are studying outside the State in different parts of the country. The students can download other necessary details and registration form from [www.highereducation.nagaland.gov.in](http://www.highereducation.nagaland.gov.in) for the 2021-22 session.

Registration form for Fresh and Renewal will be available from 1st April 2021 till 31st August 2021 and last date of submission will be 10th September 2021.

Sd/-  
(Dr. APENI LOTH) Director  
Higher Education  
Kohima : Nagaland



## TIR YIMYIM YIMOBILEM (EDITORIAL)

DIMAPUR RASEMNÜ, METSÜREMI (MARCH) 31, 2021

### MYANMAR NUNGER MEIMTSÜLA

**Y**ashi asenoki iba yimobilem nung Myanmar nung sepaitemi tashiyim agi yimsü asüba anema nübortemi apusoba ajanga lendong timtem tulu adoka nübortem aika pei kidang meliteti jena aotsüsa akümba tensa tia indang züngogo. Iba tensa tia indangji azüngdang aser angashidang, taoba küm 64 jakdang asen lima nunga India sepaitemi yimtsüng ana asem külemi yimtsüng ka nung mongdaksüli aser yim aser alu rongdoksüli ta reshikangshi dang, kibong aika tetsübu agi pei yimtak melitet arem nung lia jajaba otsü aser tensa yimdangi arua kanga temulung shia bilemer. Iba jagi, ano tanüa kasa onük nung asenok rongnung shisalemsateper. Ano, kasa onük nung Nagaland nung alirtema kanga shisadanger Myanmar nunger kar danga asen lima nung tejenokdak bushia arura, parnok dang temeim sayua yaritsü atema jet ta yimten dang masü saka arogo dena telemtetba agiadoktsü rongdak nüngdak ka repringteter. Joko, akhidang Burma ta ajaba lima, Myanmar nung election nung takok tulu angur, Aung San Suu Kyi-i aniba National League for Democracy (NLD) nem government mekümdaktsü ser parnok puoka yur sepaitemi yimten tashi agiba sülen tanü agi ita ana ajunger. Sepaitem jagi NLD lenirtemi aibelenba onük tapu aika benoka parnokji aitsütsü meranger aser küm ka sepaitemi yimsüsüa atatsü ta sangdonga lir. Ajisüaka, nübortemi mangar aser February ita tetenzüklen nungi tang tashi nung Myanmar lima yimti balala nung nübortem longjemmer anogo shia longkak aita amonger aser tesem kar nungbo Myanmar nung nüchiso bushir telok Karen National Libertion Army-temibo Myanmar nunger sepaitemi tangbo tayimtsü dena amshia nübortem alidak amaktsü tenzükogo. Taoba ita ana tsüngda sepaitemi nisung noklang pongoshi khasetogo aser aika yirua lir. Anogo shia, iba amaji Myanmar tesem ajaklen tensa majung akümba agi nübortem aika pei taküm kümzüksü asoshi kidanger bendang limatem nung jenoktsü meranger. Itemji teimbaka Thailand nung jenoka lir aser North East India nunga Mizoram nung jenoka lir. Mezüng nungi asenoki Myanmar nung sepaitem o nübortem na tsüngda lendong atalokba indang meteta lir. Aji oda, sepaitemi longkak aiter nübortem taküm mapayui injang yoka khasetba ngua, Nagaland nunga lokti tentet balalai Myanmar nübortem tasü itdakja parnok den longjemba tamaittsü tesem balala nung shimo milen tsükloka sentong agiba asenoki nguogo aser arogo purtemia NBCC-i anir sarasademtsüogo. Ajisüaka, tang ya Myanmar nungertem kar asen limai tejenokdak bushia aru nung, asenokia tejenokdak agüja anepalutsü asü (?) mesüra shimo milen tsüklokba aser sarasademtsüba jagi peritsü ? Atangji, India government-bo 1951 küm UN Refugee Convention nung sign süa mali, aser ibaji dang masü saka Myanmar nung India nunger telongpurtem mejenokdaksütsü asoshi Myanmar sepaitemi teyariji nüngdaker, iba jagi Myanmar sepaitemi ashiba angatsüsa akümer. Ibayongji, India government-ibo Myanmar den artsüsa aliba state Arunachal Pradesh, Manipur, Mizoram aser Nagaland state-tem dang Myanmar nungi jena aruba nisung shinga nema tejenokdak magütsütsü asoshi ozüng agüja lir. Iba jagi kanga mejungi yirur arurtem dak alaka Myanmar sepaitemi nungi jena arur Myanmar nunger shinga Manipur nung mejenokdaksütsü Manipur government-ia ozüng agüja lir saka Mizoram state-ibo nisung dang temeim sayuba tenung nung center government-i ozüng agüja liaka, Myanmar nungi tejenokdak bushia arur shinga meyipa meyoki anepaludagi. Myanmar sepaitemi tekong merangra, tensa tia tamajungba aotsü kehiyong Myanmar nung nüchiso bushir telok Karen nungertemi dang masü saka tangar teloktemi dena parnok ajak longjemmer Myanmar sepaitem den raratsü osang metetdakja lir. Iba osangji Myanmar sepaitemi asoshia tebilemdangtsü ken o ka asütsü, kechiyong Myanmar nung alir telongpurtemjia parnok kisüng masü saka tangar bendanger kintemia yarir. Ano, külen Myanmar sepaitemi temulung ulubaji, kidanger kin tulu ana, China o India nati parnok yarir. Ibaji kodang bilemdangdir, Myanmar tensa tia ya tamajungba aotsü aser indangji Myanmar nunger karbo tejenokdak bushia Longwa len mesüra Khiamniungan len arutsüa akok, indangji Nagaland government-i kechi ashitsü aser arogotem teinyaktsüa kechi asütsü ? Aji oda, metsütsü iba ama tensa mapang ka arura, asenokbo kecha rataa melii, parnokji temeim agi agizüker akok tashi sarasadema tesem kar nung mongdakja anepalutsü renema atatsüla.

## OLEMSABANG

### Title: Covid 19 wara sulen tawa tanü lanurtem kiyimba yimya

~ Toshi Ozüküm Kohima

2020 küm wara marutashibo asen Lanurtem kiyimba Wedding Card timbaka yamaisa liasü. Ozü tanür pa/la par tanür pa/la den temeshi kiyimba iba tenlakidang paika baji nung panuji sannuker pa ajanga temeshi kiyimba külizüng agütsütsü. Iba sentep nung atentsü pelashishia jaoker. Sentep temer ajak chiyongdaksütsü. Yamaji zülur lema agütsü.

Mapang tadong nung tejaokertem ajak pei akaba suoshi tajungtiba meruk meruka sobur mera küta kiyimsang den zep ta mena alitang temonungratsüka kiyimla kiyir sobutsü tebur junga sobur kinungertemi meiner tenlaki telungi aidang tetushi aküm agüja amangbapurtem ajak nokdaka liasü.

Kiyimla kiyimsang nem amouka yutsür telok ajaki sentong nung agüja aliba ken tepela agi nuktzü yima tener mena ali. Idangji sentong tarensen agiyonga lur sannukeri laihiba tapet zünga Tsüngrem o tajung ashitang lanurtemi nia kodaser temeshi kiyimba alizüng tongtettsü ta sarasadema amen. Kibong kümer alirtema kinungbo o kinungtsüna temeimto tali akangshi.

Item ajak tembanger sannukeri temeshi ki ayimba külizüng agütsümeso. Kiyimsang o kiyimlanati ozüng ajak shidak temolung ajak agi agizüktetnung tenlaki sunga zükpanga mena alir ajaki temolung nung sarasadema mena alitang sannukeri yamaisa ashi "nenadi item ajak shidak ta nangzük nung item arogopur ajak matsüngdng ni Sannuker pai tanü tebu ,techir aser Tanela Temeshi tenung nung nena kinungbo aser kinungtsü ama tasü agi mepila tashi meimtepa alitsü melar" ta shir tekaa agi nemeta sarasademtsür sentep tembang. Ibaji tebur tajug temonungratsü kiyimba sentong liasü.

Tawa tanü kiyimba wedding card nungbo yamai tang zülur alemba angur: onok la/pa ozü tanür la/pa den kibong akümba pelaa agizükba sentog iba jaka nung paika baji nung sarasadema arua adentsü aküm tetushi agüja jaoker.

Ashiko wedding card balaka nung oda teshimtet nisung ishika tang jaoker certificate agizüker asü mesura koda sadir aji yinti-ibo memeteter. Iba ya ABAM mesura Local Arogo telemtetbaa tasen ka nung aor asü mesura Covid 19 pandemic SOP tashi angaa nisung o nisung na tsüngta feet 6 or 7 ayutsü mechi nung lokdibo tenlakidang majar ahitsü makok. Aji saka chiyongdakbo aki ama nungtepa tang auso amer chi mesuka bener ajenteba mener chiyongteber. Ya yimya tasen ka tenteter asü ta onok yimtsü yimbotembo mangmangteber. Tenlakidangibo majar kiyimsang o kiyimlana agizükdakibo ajar. Obulanur shin o ka nung oda tsükbo anongjen ngur posu tekolak menu ama tawa tanü kibong akümba yimya ya angudang aieben mangateter.

Asenok chichiba Khritian ka ama temeshi ki ayimba ya kanga tang tongtipang lir. Kechiaser Laishiba Ibri tapu 13: 4 nung yamai shi lir: " Ki ayimbaji ajaki tetushiba nung ayutsüla" ( marriage should be honoured by all)

Anungji kibong maküm aliba ayir asangur aser tsüraburtem ajaki temeshi ki ayimba wedding card adokba yimya ya ken repringshi nung koda ta kü tepilemba kar iba ocet ajanga lemsateber . Aibelena zülusema alinunga tai dokang ta mepishir.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazüngerü angateta agitsü mepishir**

# US nung Tenla kitem raksatsür; kar nungbo satan temaitsü yutsü



Shreveport, Louisiana (US) nung aliba Tenla ki ka raksatsüba sülen kishi nung satan temaitsü 'Pentagram' noksa den satan zünya '666' zülua toktsür aliba noksa nung angur.

**March 30, 2021:** Tesüiba hopta ana tsünga US nung Tenla ki kar raksatsü aser rongdoktsütsü merangogo; Shreveport, Louisiana nunga Tenla ki ka raksatsü aser kishi nung satan temaitsü 'Pentagram' noksa den satan zünya '666' zülua toktsür liasü.

Iba Arogo nungji pastor aser pa kinüngtsü nati, parnok aliba tesem nung Arogo aika lir aser mission mapa inyaker jenti lir, ajisüaka kechiba par Arogo anema dang inyaker, ta onoki süngmanger, ta metetdaksü.

Pastor-i, "Kü kinüngtsüi kü dang 'kishi nung alibaji kechi?' ta asüngdanga liasü. Ni gari tanidak liasü anungji ni melangzü, saka gari anenba

sülen ni noksaji ngua 'tanga Arogotemia mapa tajung aika inyakdar, ajisüaka kechiba ozü Arogo anema dang inyaker' ta ni bilema liasü. Police-i iba tatalokba bushisüngdangdar," ta metetdaksü.

Iba dak alia Kentucky nunga Tenla ki ka raksatsüba dang masü saka Tenla kidang nungjagi auyaa liasü. Arogo nung leniri ashiba agi, Tenla ki mejungi raksatsü aser security cameras nunga rong tepsatsür liasü.

Tenla ki raksatsüsang jagi shidi ka zülua toktsür liasü aser shidi nungji yamai shia lir, "Ni Tsüngrem dak mamanger ka masü, ni putir den jembiogo, ni mapa tamajung inyakra anentsü

aser temelung meyiptsü. Nenok melung nung tesempa malitsüla. Pai tai atokba ama nenokia tai atoktsüla-Tophet."

Ibri oshi nung Tophet tetezü molumi lir aser iba olong ya satan külemertemia amshir.

Washington nung aliba Tenla ki-a ka raksatsü aser US sen 50,000 dak tema jenjang raksatsü.

Arogo nung leniri, "Parnoki atem, menden aser pipe organ (kongki) raksatsü," ta metetdaksü.

Iba Arogo Tenla kidang sorochocka takdanga raksatsü, ajisüaka Arogoi maneni ki malirtem aser nüngdabapurtem atema sorochocka chiyungtsü agütsüdar.

# Gujarat state nung anti-conversion ozüing tesashiba benoktsü

**March 30, 2021:** India kübok Gujarat state nung anti-conversion ozüing tesashiba benoktsü atema tawa bill ka benokogo; iba bill ya agizükra, taküm jenjang tajungba kümdaktsütsü nangzüka tamangba yimsü meyipdaksüba aser tamangba yimsü meyiptsü atema kibong akümbaji ozüing agi memelatsü.

Tawa Gujarat nung BJP-i aniba sorkari bill ka benok, aser iba bill ya agizükra ibaji ajanga 2003 küm agizükba Gujarat Freedom of Religion Act yanglushitsü.

State nung Bill tasenba kübok- tamangba yimsü meyipdaksütsü nükjidong nung taküm jenjang tajungba kümdaktsütsü atema nangzüka aser tsüngrem temoatsü agütsütsü nangzüka mapatemji ozüing memelatsü.

Gujarat nung Minister of State for Home, Pradeepsinh Jadeja-i benokba bill ji tang tagidak Assembly senden nung agizüktsüa akok, aser iba ozüing kübok aibelenertem küm 10 tashi tepuokdak ayutsü aser

senchi lakh 5 tashi achitsü akok.

BJP-i yimsüsüba state aika nung anti conversion ozüing agizükogo mesüra yanglushio, iba ya tamangba yimsü meyipba inyakyim mita reprangtsü asoshi state tem nem tashi agütsütsü asoshi lir.

Anti conversion ozüing kübok state aika nung nisung kati tamangba yimsü meyipnira sorkar ketdangertem nem jelia osang metetdaksütsüla. Iba sülen tamangba yimsü meyipnuba kulitem bushitsü, iba sülen ang melatsü.

Anti-conversion ozüingtem nung ajemdaker nisungtem mesüzüka, kangshia mesüra ashikülak ajanga tamanga yimsü meyipdaksüba mapatemji ozüing alema lir.

Hindu yimsü alia amangertemi ashiba agi, Hindu nungner aika Khristan aser Muslim yimsü dangi meyipdaksür, ta shia anti-conversion ozüing agizükter.

Parnoki ashiba agi, India nung Khristantem aser Muslim nungertemi sensaker Hindu

nunger mesüzüka Khristan mesüra Muslim yimsü dangi meyipdaksür.

Tang India nung Odisha, Uttar Pradesh, Arunachal Pradesh, Chhattisgarh, Gujarat, Jharkhand, Himachal Pradesh, Madhya Pradesh aser Uttarakhand state tem nung anti conversion ozüing benoka lir, aser item ozüing nung ajemdaker Khristantem nem tiyazü nung tai tongloktsüba ken o aika lir.

Item ozüing liaka tanü tashi India nung iba ozüing kübok shinga maitsü. India nung anti conversions ozüing ya 1967 küm tama benoka liasü.

Taküm February ita tetenzüklen Parliament nung jembidang Ministry of Home Affairs nung junior minister, G. Kishan Reddy-i, sorkari linük nung anti-conversions ozüing benoktsü tebilemba mali, ta metetdakja liasü.

"Tamangba yimsü meyipba dak sendakba nung ken otemji state sorkartem kübok lir," ta February 2, 2021 nü Parliament nung Reddy-i metetdakja liasü.

# ANO GO ABEN TSÜNGREM DEN

## Ni talidak renemi aorer

*"Aser kodang ni orr nenok asoshi talidak renemdir, ni kong lidir nenoka yangji alitsü asoshi ni tanaben nenok dangi arutsü." (Yohan 14:3)*

Tasüba agi piladaktsüba tashi ya kanga tulu lir. Tamanger mamanger ajak iba lima toktsür aotsü, saka tamanger ka atema tasüba sülen teimla ka lir aji Kibuba den maneni longjema alitsü. Yisu-i kodang pa nütsüngtem toktsür aotsü indang ashi, parnok temulung raksa liasü (Yohan 14:1). Yisu-i parnok dang mulung süngzük den teimla O agütsübaji Kibuba parnok toktsür aobaji kodanga meshilangtsüba atema masü, saka osang tajung kaji asenok pa chirtem asoshi talidak renemi aor. Tamanger ka asoshi osang tajungji tasübaji tatembang ka masü, saka tepela nung tanaben Kibuba den ajuruteptsü.

Tanü asenoki asüba ki-bo khen asoshi dang, koda junga asüyonga guarantee atemer, aser tejen akümer, lakadoker. Saka Kibubai yangluba ki nungjibo kodanga tejen makümtsü, aser teti tepela nung alitsü. Yisu Khrista asenok nungi pila aobaji asenok asoshi iba jenjang renemtsü atema pa asenok nungi tama ao. Na-a Kibubai yangluba ki nungji alitsüsa renemdar ma? Kibuba pa talidaki meyiapa aoba dang masü, saka asenok atema aoba liasü.

### Sarasadem

Temeim Yisu nai onok asoshi teti dang bilemetsür ta tanep iba lesson ajanga angazüker. Ne den teti alitsü nia maneni renemshidi. Amen

# Putirtemi telemsa adokdaksüba yimten nem vote magütsütsü mepishi

**March 30, 2021:** April 6, 2021 nü Tamil Nadu nung assembly election agitsü lia state nung Khristan putirtemi nüburtem dang taruba election nung tem masü saka secular party tem nem vote agüjang, ta mepishi.

Hindu pusemba Bharatiya Janata Party (BJP)-i election manifesto nung tamangba yimsü meyipdaksüba aser nashi tepsetba nokdangtsü atema ozüing ka benoktsü, ta nangzüka sülen Catholic Khristan putirtemi iba tayongzüka agütsü.

March 22, 2021 nü BJP-i party manifesto sayaogo; manifesto nungsa tekülem kitem aser tanga tesemtem nung nashi jenokdaksütsü atema ki sütsütsü, angopurtem aser Hindu nungner putirtem nem senotsü teyari agütsütsü aser mapa million 5 adokdaksütsü nangzüka lir.

Manifesto nungsa anti conversion ozüing- Freedom of Religion Act benoktsü nangzüka lir.

BJP-isa yimtsüngtem nung Hindu nungner putirtem nem ita shia sen 5,000 agütsütsü aser yimtsüngtem nung putir kibongtem nem scholarships agütsütsü nangzüka lir.

Tamil Nadu nung Dravida Munnetra Kazhagam (DMK)-i aniba teloktep aser All India Anna Dravida Munnetra Kazhagam (AIADMK)-i aniba teloktep na tsünga tokteptsü. AIADMK teloktep nung BJP densema lir.

Tuticorin nung Khristan putir, Stephan Antony Pillai-i, "Onoki nübur ajak nem vote agütsüdadksüner. Putirtemi nüburtem dang party ka nem vote agüjang ta mashir saka telemsa adokdaksürtem nem vote tagütsü ta mepishir," ta metetdaksü.

March 26 nü osangbener den jembidang BJP tenung metetshii Stephan-i, "telemsa adokdaksürtem indang nükjidongji temetet dang," ta ashi.

"Parnoki telemsa adokdaksütsü aser tesembatep adokdaksütsü atema metsühjang proker," ta pai ashi.

Ano Arogo lenirtem karia, state nung anti-conversion ozüing ka benoktsü, nashi tepsetba nokdangtsü aser Hindu nungner putirtem nem senotsü teyari agütsütsü nangzükbaji nütsüng timba aliba Hindu nungner mesüzüktsü atema merangba lir, ta aitsü.

Tamil Nadu nung nütsüng million 72 nungi Hindu nungner nütsüng shilem 87, Khristan nütsüng shilem 6 aser Muslim nungner nütsüng shilem 5 lir.

Madhya Pradesh nunga anti conversion ozüing aser nashi tepsetba nokdangba ozüingtem ajanga BJP-i election nung takok ngua liasü.

Stephan-isa, BJP-i telemsa adokdaksübaji Tamil Nadu nungneri magizükttetsü, kechiyong tamangba yimsü nung ajemdaker nisung tsünga telemsa adokdaksüba nungji lendong keta lir, ta nüburtemi angateta lir, ta ashi.

**OLONG PAITEP # 5768**

1				2				3		4
5		6								
							7			
8										
										9
		10					11			
				12				13		
14										
							15			
16										

<b>TIPILEN</b>	<b>LANGTSÜNGLEN</b>
2. Auo nung chiyongsü asenba - (7)	1. Lenmang - (7)
5. Mangyimba mapang - (5)	2. Aor kidong ka tenüng - (6)
7. O tamendakdak - (4)	3. Tenarong maten - (6)
8. Pei dak malangba - (7)	4. A _ _ _ g - (3)
10. Juli - (7)	6. Mopung apodoka - (3)
12. Sen ayudak - (7)	9. Tongtipang tagitsü - (7)
14. Tenük agi ajitet - (4)	10. Menungra bilem - (6)
15. Tamajung aküm - (5)	11. Aiür - (6)
16. Apuso - (7)	13. S _ _ _ k - (3)
	14. T _ _ _ r - (3)

**OLONG PAITEP # 5767 TELANGZÜBA**

<b>TIPILEN :</b>	<b>LANGTSÜNGLEN :</b>
1. Yiar, 3. Tesola, 7. Yimra,	1. Yimti, 2. Amen, 4. Shiner, 5. Alaka,
8. Tangar, 9. Peria, 10. Tanur,	6. Satan, 9. Putet, 10. Tembar,
11. Tasen, 13. Lemjem, 15. Tambu,	11. Tatok, 12. Amang, 14. Jala.
16. Khuret, 17. Sang.	



**DOCTOR ALOKBA DANGI CHITENTSÜR KA ARU :**

**Chitentsür :** Doctorba, Ni Ita shilema shidak dang aor, tepokia yamaji, aser sugar tashidaka malitsü amai B P tashidaka makettsü mesüker, chia pangnanga dang chiyunger saka ni amui sumanga oa memejangteter aja aji kechi tai ajanga?

**Doctor :** Nai tashidak ajak meteta lir sür nung kü dangi aruogoji, saka nai item tashidak rong nungi kobala lmlar? ano tashidak tulu aika lirkodi!

**Chitentsür :** Doctorba ni tanuptsu lmlaa aruba-akoya

**Doctor :** Ena! na ya tashidak kecha malia saka nesasa anüptetsüla tashidak ka keta lir amai ni esap süogo ni shidi ne mulungjang nung ya rongsen penpuba Cancer tashidak keta lir, anungji ajibo nasasa dang anüpangno!!!

**Chitantdur :** O Doctor Alokba, atangji!!!

**Lilir : Kilang Ajem, Indisen, Dimapur**

**TANÜBO NAI LANGZÜANG**

Q. SDSN (Sustainable Development Network Solutions) ya \_\_\_\_ küm saya.

A. 2012      B. 2013      C. 2014      D. 2015

\_\_\_\_\_ (Taruba adok nung onoki langzüksü)


**YASHI ADOK TELANGZÜBA : New Delhi**

**AO OSHI ANGAZÜKDAK:**

**TANÜ ANGAZÜKTSÜBA OJANG**


**Amo**  
(v) teka agi ajepshi (grope)  
\* Parnok kü indang yangku amo.

**Amo**  
(n) kidong balala tsürtem dang ajaba (maternal niece/ sister in law)  
\* Ne kü kinüngtsü teyi dang amo ta ajar.



**Happy Birthday**

**TENÜNG : T. CHANGTONGYATET LKR. (Changtongya)**  
 Talidak : Lower Agri Kohima.  
 Küm - 5      School - RDNUMS Kohima  
 Class - LKG  
 Tasoba anogo: March 31.  
 Changtongür na küm pungu junga anir aruba asoshi Tsüngrem nem tenüngsang agütsür, ano arishi anogo temjena moajangma ta sarasademtsür.  
 - Temeim Sanger boy, Odi Moaba, Oya Aola aser kinunger ajaki tepela tasoba salem abener.



**NAI-A YA METETTER MA?**

**TAA TIMTIBA ANGUR TENNIS ASAYAR KAR: MARCH 2021**

1. Roger Federer - \$106.3M	2. Novak Djokovic - \$44.6M
3. Rafael Nadal - \$40 million	4. Naomi Osaka - \$37.4M
5. Serena Williams - \$36M	6. Kei Nishikori - \$32.1M
7. Ashleigh Barty - \$13.1M	8. Daniil Medvedev - \$11.8M
9. Dominic Thiem - \$11.1M	10. Simona Halep - \$10.9M

**SUDOKU # 5811      TELANGZUBA # 5810**

	9	3	7	6				2	6	3	4	5	1	9	8	7	
							1	8	1	9	2	6	7	5	4	3	
5		8	3	9	1			7	4	5	9	8	3	2	6	1	
3	1			2			5	5	2	4	7	1	6	3	9	8	
8	6		5	3				1	3	7	8	4	9	6	2	5	
		5				8	3		9	8	6	5	3	2	7	1	4
9	3	5		1	7		6	2	3	7	2	1	9	4	8	5	6
		4					8		6	5	1	3	2	8	4	7	9
			4	6			7		4	9	8	6	7	5	1	3	2

**OJANG LUTEP # 5355**

ÜKASHU :

NERABEI :

ASÜTRJI :

HISA :

UTSARÜ :

MAA :

TITE :

LEMTEBITA :

ANMG :

ÜLYIMMATSÄ :

**OJANG LUTEP TELANGZÜBA # 5354**

**NISUNG BALALA DEN MEDEMBÄ YARI TAJUNG ASER TAMAJUNG AJAK ANGAZÜKER**

**TAN HOPTA ATEMA - KOMA SÜLA ?**

Q. Asenoka tsümartem amato yimtak dang septepa melii, jokshia jokshia asüyonga, alu nung dang lia alu ayim nunga koma süla ?

# Temelenshi bener arutsü atema Mamata tsükdaktsütsüla: Amit Shah



**Nandigram, Metsüremi/ March 30 (Agencies):** Nandigram constituency nungi BJP candidate Suwendu Adhikari-i election akoktsü ta temulung lema jembia Union Home Minister Amit Shah-i Mongolbarnü, Bengal nung ajaki yongyaa aliba temelenshi bener arutsü atema TMC chief Mamata Banerjee tsükdaktsütsüji kanga tongtibang ta ashi. Mamata-a iba constituency nung tokteptsü. Nandigram nung party office kima osangebenertem den sensaksemba mapang Shah-i, BJP-i menden aika koka

election akoktsüla, ajita asünungdang yimden yimsüsertemi teyazü tenangzükba agüja nüburttem ashioktsütsü asoshi mebilemstü, ta ashi "Nandigram nung Mamata didi akokba ajanga West Bengal nung ajaki yongyaa aliba temelenshi bener arutettsü. Idaki la tsükdaktsüra state kübok tanga tesem nung TMC tamakok angutsü," ta pai ashi. Amit Shah-i Nandigram nung roadshow ayongzükba agia liasü. Nandigram nung tawa tetsür ka tashiyim agi raksatsüba

indang jembiba mapang Shah-i, Banerjee-i o aika jembia kechiba state nung tetsürtem kümzüka mali ta bilemba lemsatep. "Lai tetsürtem kümzüka aliba indang kanga jembir. Tetsür ka iba tesem nung tashiyim agi raksatsüogo," ta pai ashi. Nandigram nung West Bengal Chief Minister Mamata Banerjee aser tembar aliba nungi tsükchir akümsang Adhikari na toktepba ajaki reprangdar. April 1 nü election agitsü aliba constituency nung March 30 nü nikongtsütsü 5 ako nung nüboyimba sentong tembangogo. Mongolbarnü Shah-i iba constituency nung tashi sayua roadshow tulu ka ayongzükba agiogo. BJP wako aser naro agi yangbanger aliba tata gari ka tekolak nung Adhikari matsüngdang nokdaker Shah-i Bethuria aser Rayapara na tsüngda lenmang nung nüburttem dak teka ayiplokja süia ao.

# BMC-i Private mozükitem nung yipden mekazüker

**Mumbai, Metsüremi/March 30 (Agencies):** Covid-19 tashidak menar tali kümyonga aoba mapang resource tem tajungba nung achaayangtsü atema Mumbai civic body-i, ward office ajak dang private mozüki aser nursing home tem nung yipden tazüng alibattem mekazüktsü tetuyuba agütsüogo. Tetuyuba agütsür liaka civic agency nem osang magütsüi private mozükitem nung Covid agi shirangertem anepaluba jangjaa akümba sülen Brihanmumbai Municipal Corporation (BMC)-i iba telemtetba agi. Tang tashidak menatepa aoba yimya nung yabo Mumbai nung anogo nung nisung 10,000 dak tashidak potettsü, ta ketdangsurtemi tsübua bilemer. Iba jenjang nung anogo nung

nisung 2000 mozükidang munga temang anepalutsüsa akümtsü. Iba dak ajemdaker BMC-i tang yipden 21,000 aliba yakta 13,773 kümstütsü. Tetuyuba nung, private mozükidang yipden shilem 80 aser ICU yipden noklang nung noklang mekazüka ayutsü aser coronavirus agi shirangertem nem ward war room tem ajanga dang item yipden amshitsü temelaba agütsütsü, ta shia lir. Kasa mapang nung covid tashidak temaitsü maketer aser tanga tashidak keta malirtem nem mozüki nung yipden magütsütsü. Iba ajanga mozüki nung temang anepalutsü nüngdakba Covid agi shirangertem atema yipden peria toktsüba nung teyari agütsütsü. Tashidak menar ajungbena aika akümba ajanga yipden agi

makoi kümogo. Mumbai nung Covid-19 tashidak menar tanem tanemi timba kümyonga aoba mapang ketdangsurtemi taoba küm ama tia tamajungbai maitsü atema health facility tem ajungkettsü merangdar. February ita BMC indang Covid-dedicated yipden occupied-to-vacant ratio 25:75 liasü, saka tang iba ya melentepogo. Seven Hills Hospital aser Bandra-Kurla Complex (BKC) nung yipden 1000 aketba Covid centre amala Covid tashidak anepalutsü atema mejeta shimba facility tem tasünger dang lir. Maneni BMC indang Cooper Hospital nunga yipden talila 288 mekazükogo. Maneni BMC-i, taoba küm ama hotel, hall aser civic building tem quarantine centre asütsü mekazükogo.

# Farooq Abdullah dak Covid-19 tashidak potet

**Srinagar, Metsüremi/March 30 (Agencies):** Taoba Jammu and Kashmir Chief Minister Farooq Abdullah dak Covid-19 tashidak potetogo, ta par jabaso aser taoba chief minister Omar Abdullah-i Mongolbarnü tweet asü. Omar-i, pa aser par kinungertem lokti nungi pilaogo aser tashidak tendangba mapang lir, ta ashi. "Kübu dak Covid-19 tashidak keta aliba potetogo aser tashidak keta aliba temaitsü kar sayudar. Tashidak metandang tashi ni ozü kinungertem den lokti nungi pilaa alitsü. Taoba anogo ishika tsüngda onok den ajuruteper alirtem dang jenjang tapet agitsü mepeshir," ta Omar-

i tweet asü. Iba ita tetenzüklen Farooq Abdullah, Sher-i-Kashmir Institute of Medical Sciences (SKIMS) Srinagar nung vaccine mezüngbuba shilem agiogo. Abdullah dak Covid-19 tashidak potetba osang angazükba sülen Ato Kilonser Narendra Modi, pa takaraba nung aneptsü imlaja ataba lemsatepogo. "Dr. Farooq Abdullah Ji, na temang anema alitsü aser takaratiba nung aneptsü atema sarasademja atadar. Ano @OmarAbdullah, na aser ner kinungertem ajak temang anema alitsü atema sarasademtsüdar," ta Modi-i tweet asü.

# Tir Kovind bypass surgery takok ngua agiogo: Rajnath Singh

**New Delhi, Metsüremi/ March 30 (Agencies):** Tir Ram Nath Kovind, Mongolbarnü All India Institute of Medical Sciences (AIIMS), Delhi nung bypass surgery takok ngua agiogo, ta defence minister Rajnath Singh-i ashi. "India tir Ramnath Kovind, AIIMS, Delhi nung bypass surgery takok ngua agiogo. Operation takok ngua agitetba atema doctor tem nem tenüngsang agütsür. AIIMS Director den Rashtrapati health dak sendakba nung sensaksemogo. Pa takaratiba nung aneptsü sarasadema adar," ta Singh-i tweet asü. Teku nung minprong aliba

indang ashishiba sülen arishi küm 75 tai tir ya taoba Hokolbarnü Indian Army indang R&R Hospital nung temang tendang. Iba sülen pa AIIMS-i belener ao. "India tir Nath Kovind tanü (March 27) nikongtsütsü AIIMS, Delhi-i belenerogo. Temang tendangba sülen doctor temi pa bypass procedure ka agitsü tuyuogo, koba March 30 anepdang agitsü. Tir temang junga dang lir aser pa AIIMS nung mongintemi anepaludar," ta pa office ajanga March 27 nü metetdaksü. Pa mozükidangi anir aoba sülen Ato Kilonser Narendra Modi densema lenirtem aikati pa health jenjang metetnüa ken o asüngdangyago.



AICC General Secy Priyanka Gandhi aser Congress candidate Aritha Babu na Kerala kübok Kayamkulam tesem nung election atema nüboyimba sentong nung shilem agiba noksa nung angur. Aritha Babu ya Kerala assembly election nung Congress Party candidate tanobusang lir.

# Airport nung mask junga masemer dang senchi achitsü

**New Delhi, Metsüremi/ March 30 (Agencies):** Aviation regulator DGCA-i Mongolbarnü airport tem dang, Covid-19 tetuyuba dak ajemdaker mask junga masemba aser tetsüngda ita inyaksangshi masertem dang police teyari agia senchi achitsü atema asadangtsü tuyuogo. March 13 nü Directorate General of Civil Aviation (DGCA)-i airport aser airline tem dang tayimtsü nung senzürtem mask semdaksütsü, tetsüngdang ita inyaksangshidaksütsü aser aibelenertem merenshitsu tuyuogo. Mongolbarnü sangdong ka ajanga regulator-i ashiba agi, "airport kar asadanga sülen covid-19 inyakyim shidak benoka minyakba ngutetogo." "Airport achaayanger ajak dang, airport telongtet nung teni tebang ajak nembanga mask asemstü aser tetsüngda ita

inyaksangshitsü atema tetuyuba tejangja agütsütsü mepeshir," ta sangdong nung shia lir. "Temzüng ozüng dak ajemdaker local police den sendaktepa, aibelener dang senchi achitsü atema asadangtsü," ta parnokisa ashi. March 13 nü sangdong nung airport achaayangertem dang, aiben shiaka Covid-19 inyakyim sülen manidakertem security agencies nem agütsütsü tuyuogo. Maneni DGCA-i, airline tem dang Covid-19 inyakyim sülen manidakertem tayimtsü nungi anizüka toktsütsü aser parnok ita asem tayimtsü nung mesenzüdaksütsü atema asadangtsü shiogo. March 15 nungi March 23 tsüngda domestic tayimtsütem nung Covid-19 inyakyim sülen manidakertem ita asem atema tenokdangba agütsütsü akok, ta DGCA ketdangser kati taoba hopta ashi.



Tamil Nadu assembly election matong tsüngda Tiruppur district kübok Dharapuram tesem nung NDA allied candidate tem atema nüboyimtsüba sentong nung Ato Kilonser Narendra Modi-i o jembiba noksa nung angur.



Prague, Czech Republic nung aliba Old Town Square nung COVID-19 agi asürtem asoshi memorial ka yanglua alidak asür nem akum agütsüba noksa ka yangi angur. Coronavirus tashidak ajanga central Europe nung timtem jenti bener arutsür aser tashidak menatepa aoba tali akumer. Tawa Czech Republic aser Slovakia linüktem nung kanga sashia kongshi, saka parnoki lockdown akhang-akhanga benokba sülen temelenshi angur.

### Longkak aiter tepsetba mechi sorkar anemba teloktemi amokmerener

**Naypyitaw, Metsüremi/ March 30 (Agencies):** Mitkartemi sorkar atsüngdokba anema longkak aitertem tepsetba manenra raratsü renema lir, ta Myanmar nung sorkar anemba telungpur telok aseme amokmerenogo.

Ta'ang National Liberation Army, Myanmar Nationalities Democratic Alliance Army aser the Arakan Army (AA) teloktemi lungjemer Mongulbarnü osang ka sangdongba nung, mitkartemi nüburtem tepsetba manenra onoki longkak aiter den lungjemer raratsü, ta ashi.

February 1 nü mitkartemi sorkar atsüngdoker yimsü süa aruba mapang sepaitemi nisung

510 shi tepsetogo, ta iba tensa mita asadangba telok, Assistance Association for Political Prisoners (AAPP) ajanga sangdongba mapang iba tekümdangtsü osang ya sangdonger. Longkak ait tenzüker azüdokshiba rongnung Honibarnü ya tamajungtiba liasü, kong nisung 141 tepset, ta parnoki ashir.

Nisung asür timba akumba mapang longkak aiter telok tongtiba, General Strike Committee of Nationalities ajanga linük nung ethic minority telok aika alir dang mitkartemi tim mesüi ajembangtsü merangba anema nokdakba nung yaritsü asoshi Hombarnü shidi ka zülua liasü.

Mongulbarnü telungpur telok asem nungi iba osang sangdongba ajanga longkak aitertemi mepishiba angashir amai ajiteter.

Item telok yagi mitkartem dang sorkar atsüngdokba anema nokdakertem den jembishinüa tajungtiba nung angateteptsü ajungshia liasü.

"Iba ama tai maket civilian tem tepsetba ya magizükteter," ta AA indang odongtar Khine Thu Kha-i ashi.

1948 küm British nung ket nungi nüjiso anguba sülen Myanmar nung ethnic minority telok 20 dak temai autonomy, ethnic identity, temesepba mozü aser ali rongsen mechi rarayonga arur.

### Afghanistan nung polio mozü agütsür asem khaset

**Jalalabad, Metsüremi/ March 30 (Agencies):** Prangbong bena alirtemi Afghanistan anüdoklen Jalalabad yimti nung polio vaccination health worker tetsür asem tepset, ta sorkari ashi.

Tesem ana tashinung iba lendong ya shirnoki agütsür ano mejangja, ta provincial sorkar nungi ketdangsur kati Mongulbarnü ashi. Central sorkaria iba lendong atalokba ya jangjatsüogo.

Coronavirus tashidak menatsü tetsübu nung liaka Afghanistan aser kidang linük, Pakistan nung Hombarnü nungi tenzüka anogo pongu tashi ki sema polio mozü agütsü tenzüka mapang lendong ya ajurur.

Afghanistan nung province 34 aliba nungi province 32 nung tanur million 9.6 nem iba mozü ya agütsütsü nükjidong yur campaign ya tenzü, ta health ketdangsurtemi ashir.

Küm tenzüker anti-polio vaccination campaign tanabuba nung health worker 55,000 dak temai anogo pongu tashi iba mozü agütsüba maparen ya inyaksü, ta Afghan Health Ministry nung polio coordinator, Mir Jan Rasikh-i ashi.

Ajisüaka Afghanistan nung polio agütsüba maparen nung

tetsükdaktsü tulu lir. Tesüiba mapang ama Taliban telok yagi pari amokbanga aliba tesemtem nung kidangi tsüngdong oa mozü agütsütsü memelatsü.

Health worker temi ki ka nungi ki kati oa mozü agütsütsü sentong atema tenangzüktep ka agütsü asoshi World Health Organization den tang tashi jembishinüba mapang lir, ta Taliban odongtar Zabiullah Mujahid-i ashi.

Security mechi Taliban kübok aliba tesemtem nung iba inyakyim atsülanger, ta Mujahid-i ashi.

Tesüiba küm asem nung tanur million asem shi nem polio mozü magütsütet, ta Afghan health ministry ajanga ashi.

Taküm linük nung polio tashidak agi meneper nisung 20 shi liasü, ta ministry ajanga ashi.

Arishi küm pongu tekübok alir tanur million 40 dak tema nem anogo pongu tashinung anti-polio vaccine ya agütsütsü nükjidong yur Pakistan nung Hombarnü tenzü.

COVID-19 tashidak nungi kumzüka alitsü meratem agia Pakistan nung district 156 nung front-line worker 285,000 shi-iba mozü ya jemdaktsüsü.

Taoba küm Nigeria nung polio virus mali ta sangdongba sülen alima nung polio tashidak

### Mopung menenba ajanga Nepal nung school tem shibang

**Kathmandu, Metsüremi/ March 30 (Agencies):** Lendongi aitsüsa mopung kanga menena akümba sülen Nepal nung anogo pezü school shibangtsü atema tetuyuba agütsüogo. Iba ajanga linük ajunga nung kaketshir million aika kidang nungi mainshitsüsa kümogo.

Nepal nung nütsünyongsük million 30 shi lir aser iba linük ya alima nung mopung kanga menentsüba linük China aser India na yongtsü nung lir.

Mopung menenba ya linük yimtiba Kathmandu atema tebilemsü tulu ka lir, koba sorkar asoshi coronavirus wara azüoktsü merangba mapang ano tebilemsü ka bendenlokba asütsü.

Hopta tatemi mopung menenba jenjang, 2016 küm

nungi sorkari maongka aruba rongnung tamajungtiba aküm, ta sorkar ketdangsur Shankar Paudel-i Reuters dang ashi.

Education ministry otongdar Deepak Sharma-i, school shibangba ajanga kaketshir million ti shi dak kongshiogo, ta ashi.

Ghonda 24 tsüngda average level PM2.5, fine particulate matter koba tepokpok tonga iteter, iba jenjang ya Deobarnü Kathmandu kübok Bhaisepati temeket nung 214 micrograms per cubic metre liasü, ta Department of Environment data ajanga sayuogo. Sorkar standard level-ji 40 micrograms per cubic metre lir.

Linük yimtiba nung tawa mopung jenjang tamajungba kuma odar, saka average pollution readings mongutet.

(Maneni tapak 9 nung...)

### John Magufuli nem akhüm tetushi agütsüi arur 45 ajemset

**Dar Es Salaam, Metsüremi/ March 30 (Agencies):** Dar es Salaam nung March 21 nü asür tir John Magufuli nem tatemsabuba aküm tetushi agütsütsü asoshi senteper nisung 45 ajemset, ta Tanzania police-i Mongolbarnü metetdaksü.

Lenir nem aküm teushi agütsütsü asoshi Dar es Salaam yimti kübok stadium kati nisung meyirejang aika aitsü merangba mapang iba lendong ataloka liasü. March 17 nü Magufuli mapai maruba indang osang sangdongba sülen ajungbena asü.

"Stadium telungi inertem aika liasü aser parnok rongnung kari matatet. Parnoki stadium telungi kangshia aitsü merang aser iba ajanga lendong atalok. Iba tatalokba nung nisung 45 süogo," ta Dar es Salaam regional police commander

Lazaro Mambosasa-i AFP dang ashi.

Asürtem rongnung nisung pongubo kibong ka nungi dang liasü, ta Mambosasa-i ashi. Tetsür ka aser tanur pezü Uhuru Stadium nung ajemsetba indang osang sangdonger liasü saka iba mapang nung asürtem indang osang tejangja magütsü.

Mambosasa-isa, iba lendong nung nisung aika yiruogo, saka parnok timba mozükidang temang anepalur yokadokogo, ta ashi.

Magufuli tasü mang ya Dar es Salaam, Dodoma, Zanzibar, Mwanza aser Geita yimti sema bener senzü aser iba sülen par yimtsüng Chato nung March 26 nü arem.

Tasü mang yimti ka nungi kati bener senzüba mapang nisung meyirejang aikati aküm tetushi agütsüogo.

(Maneni tapak 9 nung...)



Bucharest, Romania nung COVID-19 tashidak wara mechi tenokdangba balala agütsüba anema nüburtemi longkak aiter mapang lanur anati kaket ka nung "Onok isolation nung lir" ta zülua amer longkak aiter repringba angur. Romania nung tenokdangba tasen benoker anogo ka lir yimti aika nung item tenokdangba anema Hombarnü nung longkak aita liasü.





Metsüremi/March 30, 2021: West Bengal assembly polls indang tanabuba phase agitsü aliba tejakdang, West Midnapur nung Tollywood actor aser BJP candidate Hiranmoy Chattapadhyay pusema election campaign ka nung Bollywood actor aser BJP leader Mithun Chakraborty-i shilem agiba noksa nung angur.

## Flipkart ajanga Poco X3 Pro ayoktsü

New Delhi, Metsüremi/March 30, 2021 (Agencies): Alima tesem balala nung sayaba sülen, anogo ishika lir India nung Snapdragon 860 processor

ajanga 33W fast charging support asür. Poco-i ashiba agi, iba phone ajanga ghonda 11 gaming aser video playback mapang ghonda 18 tashi agütsür. Iba den bendenloksema,

aketba Poco X3 Pro sayaogo. Flagship 4G smartphones atema Qualcomm ajanga Snapdragon 860 ya alakteta yangluba processor ka alitsü. Iba phone ya storage option ana aser Graphite Black, Steel Blue mesüra Golden Bronze sentsü nung angutsü; aser tejangrar temi smartphone ya Flipkart ajanga April 6 nungi tenzuka alitetsü. Flipkart customer temi ICICI debit aser credit cards ajanga iba phone nung sen 1,000 instant discount angutsü.

Poco X3 Pro nung quad rear camera system, 5,160mAh battery aser display tuluka inoktsüogo. Iba smartphone ya taoba küm September ita sayaba Poco X3 den tatongtep alitsü. Company-i ashiba agi, tech aser gaming jangrartem

atema iba smartphone ya device tetemjen asütsü. Specification tsütsü reprangdangra, Poco X3 Pro nung 6.7-inch Full-HD+ (1,080x2,400 pixels) LCD display den 120Hz refresh rate, 240Hz touch response aser 450nits peak brightness keta aliba angutsü. Tekümzüksü atema, iba screen panel nung Corning Gorilla Glass 6 layer aser selfie camera atema hole-punch cutout dena lir. Iba smartphone maparen Qualcomm Snapdragon 860 SoC den 8GB RAM aser 256GB UFS 3.1 storage ajanga achaayangtsür. Memory ulua aginürtemi, microSD card ka ajanga 1TB tashi atsülanga amshitetsü.

Poco X3 Pro indang battery tasazük 5,160mAh lir, koba

battery kümzüksü mechi Poco X3 Pro smartphone yagi automatic ajanga refresh rate - 50Hz, 60Hz, 90Hz mesüra 120Hz tashi melenteter. Smartphone tesülen, quad camera system nung 48-megapixel primary camera den f/1.79 aperture, 8-megapixel ultra-wide-angle camera den f/2.2 aperture aser macro den portrait photography atema 2-megapixel shooter ana inokja lir.

Selfie aser video calling atema, Poco X3 Pro tejaklen 20-megapixel snapper ka angutsü. Tanga feature tsütsü reprangdangra, iba smartphone nung Android 11-based MIUI 12 custom skin, LTE, dual-band Wi-Fi, Bluetooth 5.0, GPS, NFC aser charging atema USB Type-C port angutsü.

### Office of the MONGSENYIMTI COMPOUND BAPTIST AROGO

P. O. Chuchuyimlang -798 614 Dist:- Mokokchung, Nagaland

#### TENUNGSANG AGÜTSÜR

Wb. K.N.Temjen Jamir aser Wt. Latonglila Lemtur jabaso **Dr. Menjiwapong**, Mongsenyimti Senso tajung aser Mongsenyimti Compound Baptist Arogo nungi Tanela aser taküm libaliro ajak nung apetasung meketi lia inteta Tsüngrem tenzükba wadang nung shiba dang Allahabad Bible Seminary nung Asst. Professor lir. Pai Tsüngrem tenzükba aser Pa O pushiba nung kanga bendanga aguja arur Senate of Serampore College (University) nungi Dissertation "ENVIRONMENTAL DIMENSION OF ESCHATOLOGY: AN ECOLOGICAL READING OF 2 PETER 3:1-13 AND ITS IMPLICATION FOR CREATION CARE AMONGTHE NAGAS" nung zülua Doctor of Theology (D.Th) renemba asoshi Tsüngrem tenung asanger aser pa nema konang tetushi agütsür.

Nür wadang nung tarutsü nunga Tsüngremi nü ajemalu, terajem shisatsü aser ajungmesoba jakla ajanga jenjang tuluba aser takok temoatsü temaba asoshi Arogoi ajungshir aser sarasademtsür.

Sd/-  
Rev. Imtimpang  
Pastor, MCBC



Sd/-  
Mr. N. Imo Ozükum  
Secy. MCBC

### OFFICE OF THE DIMAPUR ALIBA SENSO TELONGJEM DIMAPUR, NAGALAND

#### TENUNGSANG AGÜTSÜR

Mr. Talitsungba Ao & Mrs. Nengsangwala na jabaso MR. MADANGCHANOK IMCHEN-i Genomic Science nung Doctor of Philosophy, Thesis Title : "Comparative Metagenomic Studies on Prokaryotic Community Structures, Functional Complexity and Antibiotic Resistomes in Kerala Mangrove Sediments", Central University of Kerala nungi Dr. Ranjith Kumavath, PhD Supervisor lenisüba kübok takok anguba atema Dimapur Aliba Senso Telongjem-i tenungsang agütsür.

Nai iba jenjang ajangzükta atema onok nüma-atanger aser tarutsü nunga nü wadang nüburtem asoshi temoatsüba südakjang ta Union tamang sarasadem.

Sd/-  
Mr. Tekangangshi,  
President.



Sd/-  
I. Meren Kichu,  
Secretary.

## Mopung menenba... (Tapak 8 nungi...)

Mapa inyakba tesemtem mopung menenba ajanga nungi awi, gari tamajung nungi asütsü akok, ta ashi. mokozi, longru muluba tesem "Taoba mapang Kathmandu nung iba amai mopung menena nung nagmati arongba agi nung iba amai mopung menena akümba ni mebilemeter," ta mokozi adokba ajanga yimti akümba ni mebilemeter," ta mopung menena aküm aser iba Khadka-i ashi. ajanga cancer, stroke, asthma Nüburtem dang jongdak aser high blood pressure amala maparen kar atema mesera adokdaksütsü, ta mongintemi kimai matoktsü health ministry-i ashi. metetdaksüogo.

Kasa mapang nung Kathmandu nung Kasa mapang nung Kathmandu nung anosotsü international airport ayonger arishi küm 65 tain ketdangsertemi ashiba agi, Arjun Khadka-i, pai teni aser nema aia akümba ajanga tenük mesakba aser aronger Hombarnü tayimtsü ama aitba kodanga senzusenpong nung majangshidang aser iba ya tetsükdaksü adokogo.


## John Magufuli nem... (Tapak 8 nungi...)

Iba lendong ya aküm tetushi agütsüba sentong tenzükter tanünübuba Dar es Salaam kübok Uhuru Stadium nung agiba mapang atalok, kong nüburtem nem aküm tetushi agütsütsü atema temelaba agüja laisü.

Magufuli arishi küm 61buba nung asü aser ketdangsertemi ashiba agi, pa temulungjang tashidak agi asü. Pa hopta asem shi samadokba sülen ajungbena asü aser pa asüba kuli tejangja memetet. Opposition temibo pa Covid-19 tashidak agi asü ta shiogo.

Magufuli indang deputy Samia Suluhu Hassan-i linük nung mezüngbuba tetsür tir ama menden belenzük, aser pa den tepila sentong la lenisüba kübok agi.

Lendong atalokba sülen tasüngnü linük yimtiba Dodoma



John Magufuli

nung asüpila sentong agiba mapang Africa linüktem nungi lenirtemi shilem agia liasü.

Taoba ita video ka nung Mpango mozüki ka kima osangbenertem den sensaksemba mapang akhetba den tangola mesapoinba nguogo aser iba ajanga pa Covid-19 agi asü ta olulu osang prokshi.



Dimapur, Metsüremi/March 30, 2021: Hombarnü (29.03.2021), Dimapur Area Ao Asso. Pastor Youth Telongjem ajanga Teintet Lanur asoshi "Shishi Pokyimer Sensaksem" sentong ka Diphupar 'B' Ao Baptist Arogo nung ayongzuka agia liasü. Iba sentong nung shisalen sayur Mr. Imtisunep Longchar, Founder of ILANDLO liasü. Iba sentong nung Arogo 19 nungi teintet lanur 102 tashi denogo. Diphupar 'B' Ao Baptist Arogo-i iba sentong akatsü asoshi Tekülem ki melaba den sentong dak sentakba maparen ajak anepalutsüba asoshi Dimapur Area Asso. Pastor Youth Telongjem ajanga kangasa pelaba metetdaksür ta Mr. Takosashi President aser Mr. Chubatongzuk Secretary ajanga sangdong ka nung metetdaksü.

## KSL-4 atema Kohima Town Club-i jaoker



**Kohima, Metsüremi/March 30, 2021 (TYO):** 4buba Kohima Super League 2021 nung shilem agitsü atema Kohima Town Club-i jangra alir Football club tem jaoker. Iba asayamung April 21, 2021 nungi tenzüksü, ta sangdong ajanga metetdaksü. Ita piyong agitsü aliba Championship asayamung ya

## Miami Open: Naomi Osaka quarter-i iogo

**Miami, Metsüremi/March 30, 2021 (Agencies):** Tang asaya aliba Miami Open tetsür kija round of 16 asaya nung, US aser Australian Open champion Naomi Osaka-i 6-3, 6-3 agi Belgium tsür seed 16 Elise Mertens tsükdaksüba sülen, asayamung quarter-finals-i iogo. "Iba asaya tetenzüklen ni junga asaya liasü aser ajungbena dang ni tera anüalema kümadok. Taoba ama ni kara aser yakyaka masayatet. Asaya tera karatsüla ta yimdangi arur külen nungi temulung agüja asaya," ta Osaka-i ashi.

Pezüben Grand Slam takok angur Osaka-i 2-0 alidang love nung break point aser 5-1 nunga love nung break point angu, saka game tenetbuba nung Mertens-i Osaka amokbang aser game tibuba tashi asayatsüsa lai Osaka nem set point pezü tashi nokdangteta asaya.

Osaka, shibai Miami Open title mezüing takok angutsü asoshi meranga asayadar, lai break point ka den ace tasembuba angu aser la indang tenetbuba game nung service ka agi lai mezüing set takok angu.

Set tanabuba nung, Mertens nem maongka magütsütsü atema Osaka-i break point ka angutsü meranga toktepdang, saka tena 2-2 kümadok aser la tapubang anepalu masüidang Mertens 3-2 agi Osaka tejakdang aküm.

Osaka tapubang achijilen

April 21, 2021 nungi May 8, 2021 tashi IG Stadium Kohima nung asayatsü.

Convenor, Organising Committee Kethozelie Liezietsu-i, local level football tenzükba ajanga Nagaland nung football wadang tsütsü temelenshi tulu adokdaksütsü aser State nung football asaya tejakleni bener aotsü asoshi iba

Anepaluba sülen, lai tanüingba game pezüprongla atonga takok ngua set tanabuba koktet.

Tetsür kija asaya tanga ka nung, Top-rank nung alila aser defending champion Ashleigh Barty-i taoba mapang world no. 1 Victoria Azarenka madak 6-1, 1-6, 6-2 agi takok ngua quarter-final-i iogo.

Tanabuba round nung, Barty-i Kristina Kucova madak set asem atonga takok ngua liasü aser taruba round nung lai seed tenetbuba Belarus tsür Aryna Sabalenka den asayatsü.

Sabalenka-i seed 19 Czech tsür Marketa Vondrousova madak 6-1, 6-2 agi takok nguogo.

"Iba ama tongtibang asayamung quarter final nung asayatsü maongka anguba atema pelar," ta Barty-i ashi.

"Tang dang nungi ano yimya aika melenshia tajungba asayatsüla. Ni ano kangarabo junga masayar ama ni bilemer, saka kü tashimait ajak asadanga aser item nung tajungba melenshia asayatsü asoshi ni inyakdar," ta Barty-i shisem.

Ukraine tsür seed pungobuba Elina Svitolina-i Czech tsür Petra Kvitova madak 2-6, 7-5, 7-5 agi kokogo.

"Iba asaya mezüing set nung tamakok ngur sülen tanüingba set ana atonga takok anguba asoshi pelar. Kü asaya yimya aser tasa nung ni temulung süa dang shilem agidar. Iba asayamung akoktsü asoshi ni tajungtiba nung asayatsü

league nükjidong lir, ta ashi.

Iba league dak sendakba nung, April 5, 2021 matongdang, tejangrar club temi Sports Paradise, Riiluo Market, Kezieke nung form meshia register sütetsü akok. Register asütsü atema club tejen pur (taoba league nung shilem agir club) taa sen 10,000 aser club tasen atema taa sen 15,000 alitsü.

Taküm, KSL-4 nung takok angur team nem senpet sen 1, 50,000, runners up nem senpet sen 100,000 agütsütsü renema lir. Kasa mapang, tanga award rongnung, player of the tournament, best fan club, best discipline club dena lir.

Tang tashi nung, iba league atema team 8 agi shilem agitsü osang jangjatsüogo. Item team rongnung taoba league takok angur Vanguard FC - Tseminyu densema New Market FC, T Comrade FC, Puliebadze FC, Aphuyemi FC, FIFA FC, TA Jakhama, KVYO nung alitsü.

Maneni, iba asayamung dak sendakba nung osang tejangria agitsü atema, tejangrar club temi Organising Committee - ph no. 7005537505 (Convenor) mesüra Azho Sophie-9436800769 (Co-convenor) den tongteprateptsü akok.

tebilemba lir," ta Svitolina-i ashi.

Svitolina-i quarter-final tanabuba nung Croatia tsür Ana Konjuh mesüra Latvia tsür Anastasija Sevastova den asayatsü.

Kasa asayamung tebur kija asaya nung, Russia nung seed pezübuba Andrey Rublev-i Hungary nung seed 29 Marton Fucsovics madak 6-2, 6-1 agi takok ngua round pezübuba tongtetogo.

"Tesüiba ita ishika tejakdang nungi ni tennis junga asaya arudar aser tanüingba asaya nunga tajungtiba asayatsü imlaa atar," ta Rublev-i ashi.

Moscow nungi arishi küm 23 tain Rublev-i pezübuba round nung arishi küm 32 tain Croatia nung Marin Cilic den asayatsü.

Tebur kija asaya tanga ka nung World no. 45 Marin-i 6-3, 6-4 agi Italy nung Lorenzo Musetti tsükdaksü.

"Asayar tasen den toktepa iba asaya takok anguba atema pelar. Iba tour nung maneni shilem agiyonga aotsü temulungtetba tulu lir," ta Cilic-i ashi.

Canada nung rank 19 nung alir Milos Raonic-ia France nung Ugo Humbert madak 6-4, 7-5 agi kokogo. Taruba round nung Milos-i Poland nung seed 26 Hubert Hurkacz den asayatsü. Asaya tanga ka nung, Hubert-i Canada nung seed trokbuba Denis Shapovalov madak 6-3, 7-6 (8/6) agi kokogo.

## Tokyo Olympics nung Japan PM-i Biden jaoktsü akok

**Tokyo, Metsüremi/March 30, 2021 (Agencies):** Taruba ita United States semdangba mapang, Tokyo Olympics nung US Tir Joe Biden jaoktsü akok, ta Hokolbarnü Japan Ato Kilonser, Yoshihide Suga-i ashi.

April 9, 2021 nu Ato Kilonser Suga-i White House semdangtsü imlar. Parliament nung lawmaker' kati Tokyo Olympics nung Biden jaoktsü asüing ta Suga dang asüingdangba mapang, Suga-i, "Hau, pa (Biden) jaoktsü imlar," ta telengzüba agütsü.

Ajaki yongya ataba Tokyo Olympics asayamung July 23, 2021 nungi tenzüksü terenemba lir. Taoba küm (2020) alima ajunga asüingba coronavirus wara tenokdangba ajanga, iba asayamung magiteti anogo atsülangja aruogo.

Tesüiba anogo ishika tejakdang, Olympics

ayongertemi ashiba agi, iba asayamung reprangtsü atema bendanglen nungi fans memelatsü/marudaksütsü.

Olympics aser Paralympics nung athlete 15,400 agi shilem agitsü. Kasa mapang, asayamung anaprongla nung ketdangsurtem, tetendangertem, VIPs, tongtibang nisungtem, media aser broadcaster meyi 10 dak tema adentsü.

Taküm January ita Biden-i US Tir ama Office maparen agizükba sülen, bendanglen lennir rongnung Suga-i pa den mezüing ajuruteptsü imlar.

US-i maodang Ato Kilonser Suga aser pa den külemi aotsüpur staff 80 nungi 90 tashi coronavirus vaccine agitsü, ta ketdangsur sangdong ka ajanga metetdaksü.

Biden aser White House nung inyaker staff ajak coronavirus vaccine agiogo.

## Ronaldo indang 'armband' auction asütsü



**Belgrade, Metsüremi/March 30, 2021 (Agencies):** Portugal aser Serbia tsüingda World Cup qualifier asayaba mapang, Portugal captain Cristiano Ronaldo-i idaktsüba goal ka magizükba sülen, pai tejashi nung indokba/merepdokba armband ka auction asütsü atema Mongolbarnü agütsüogo.

Honibarnü, Belgrade nung Portugal aser Serbia napronglai goal 2-2 idaktsür aliba mapang, asaya tatemlen Ronaldo-i telok atema goal tasembuba idaktsü, saka referee ajanga iba goal magizük aser parnok tsüingda mangatetep adoka liasü.

Iba asaya goal 2-2 draw nung temer sülen, Stadium nung mapa inyaker kati Ronaldo-i indokba armband ya shia aru. Charity mapa inyaker telok kati pa (Stadium nung inyaksang) ket nungi iba

armband ya meshizük.

Serbia nungi ita 6 tanur ka, shiba 'spinal muscular atrophy' agi timtemdar, iba tanur surgery agitsü atema charity telok yagi senotsü lenmang bushidar aser parnoki Ronaldo indang 'armband' ayokba sen yagi iba tanur yaritsü.

Iba charity telok sangdong ajanga angazükba agi, ojang 'C' ajener aliba blue sentsü armband ya anogo asem atema online nung auction asütsü sentong lir.

Asaya ketdangsurtemi Ronaldo indang goal magizükba sülen, tatembang whistle mapudang pa asaya nungi tukadok. Dressing room leni aoba mapang, tejashi nung Ronaldo-i pa teka nung inoker aliba armband ya moapu line anasa indoka yutsü.

Ronaldo-i iba amala yimya sayuba ajanga nüburtemi pa kanga aitsüogo.

## BILEM DANGANG

"Nisung karibo pei sempet memeteti akümüli wadang süidaksür."